


池北偶談



漢書門	
二 八 三 三	一
號	類

內閣文庫	
三 〇 七 函	二 八 三 號
架	冊
漢	書

內閣文庫	
番號	漢 2833
冊數	10 (2)
函號	307 269

三之五



A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale



© Kodak, 2007 TM: Kodak



池北偶談卷三目錄
談故四之三 凡五十則

淺草文庫



大學題名碑

祭禹陵

翰詹之長

正副考試官

七品銜

狀元出典鄉試

閣學

廣文

印文

癸未

八股

督捕

特旨內陞



考選

結銜

漢軍漢人

義王

義字諡



池北偶談卷三目

閣諡

詹事府

臣下私諱

宰輔編年錄

賜御筆

講筵問答

于成龍陸龍其

宋官制

國朝官制

宋四聖御押

宋祠祿

大學士兼尚書

學士大拜

學士兼侍郎

讀卷

先授編檢科道

國朝狀元

三國貢物

國書之制

試卷稱名

伐木

優老

賜宴褒忠

御製詩

善果寺御書

乘肩輿

兼銜

宮銜


謁陵詩

安南始末

周禮部使交趾詩

林舍人使琉球詩

卷三目畢



池北偶談卷三

談故

濟南王士禎阮亭著——高都姪廷掄簡菴較

太學題名碑

予前記本朝國學進士題名碑未立為闕典官祭酒時欲疏請未果丁卯御史言之禮部覆疏允行按水東日記云內官阮安督工建太學時悉取前元進士碑磨去刻字今三年一立石皆是物也此雖與五代時劉鄩守長安取古碑甃城事微不同然古蹟湮沒亦可惜也

祭禹陵

康熙己巳二月 上巡幸武林因渡錢塘親謁大禹陵諡

總督侍郎臣王隲曰朕巡行江表緬懷禹德躬率羣臣展祭陵廟顧瞻殿宇圯傾禮器缺略人役寥寥荒涼增歎愚民風俗崇祀淫祠俎豆馨香奔走恐後宜祀之神反多輕忽朕甚慨焉自昔帝王陵寢理應隆重培護況大禹道冠百王身勞疏鑿奠寧率土至今攸賴豈可因循特書地乎天成四字懸之宇下着地方官卽加修理畢備儀物守祀人役亦宜增添俾規模弘整歲時嚴肅兼賜銀二百兩給與守祀之人此後益令敬慎地方官亦須時爲留心以副朕尊崇遐慕之懷其卽遵諭行蓋是行原因視河故於禹陵特加崇重如此

翰詹之長

康熙二十七年掌詹事府事禮部尚書湯公斌改工書以禮

部左侍郎張公英兼管詹事府事二十八年翰林院掌院學士李公光地調通政使以文華殿大學士兼戶部尚書徐公元文兼管翰林院事皆不設正員其後張公以禮書兼掌翰詹二衙門事

正副考試官

舊例翰林給事中同爲考試官則翰林爲正給事爲副吏部與五部同爲考試官則吏部爲正五部爲副獨康熙壬子科戶部郎中郭昌吏部主事彭襄同主廣東試以郭爲正彭爲副以郎中主事爲副序不論衙門辛酉科工科給事中許承宣翰林院編修汪霽同主陝西試以許爲正汪爲副今丙子科福建鄉試亦以給事中党聲振爲正檢討王者臣爲副

者臣予門人此出

偶然非故事也

七品銜

宋制見任官得應制科文官許二次武官一次謂之鎖廳國朝惟內閣中書舍人貢監出身者許應鄉試舉人出身者許應會試他卽無之近江寧黃虞稷慈谿姜宸英以諸生薦入館修史特加七品服俸 覃恩得以其品馳封父母而實未授官也

狀元出典鄉試

舊例詞林第一甲一名及第者止充會試同考官不出典各布政司鄉試自康熙己酉科己亥狀元徐元文以侍讀典陝西試甲辰狀元嚴我斯以修撰典山東試始變常例其後壬

子科庚戌狀元蔡啓傅典順天試乙卯科癸丑狀元韓菼典順天試丁巳科丙辰狀元彭定求典順天試辛酉科己未狀元歸允肅典順天試丁卯科乙丑狀元陸肯堂典江西試遂沿爲例

閣學

明殿閣詞林記有殿學閣學詹學翰學之名 國朝閣臣大拜祇稱中堂或稱相公而內閣學士則稱閣學按葉石林避暑錄云宣和末陳亨伯以捕方賊功進龍圖閣直學士稱龍學顯謨徽猷二閣直學士欲效之而難於稱謨學猷學乃易爲閣學此稱閣學之始

廣文

唐宋以來仕宦多乞鄉郡以便養猶有古意明代始不得官
本籍至廣文寒官亦有越在萬里者 本朝廣文皆銓本直
省但不仕本郡耳

印文

明嘉靖中大同五堡之變失總兵官所佩征西前將軍印職
方請給新印海鹽鄭端簡公時為主事議改印文柳葉篆或
稱別將軍或增減其字以防詐僞且言胡忠安公在禮部失
行在禮部之印改鑄易爲行禮部印此在內衙門且然況邊
鎮兵權又反側不靖時耶近用兵諸省恢復地方請印吏科
給事中趙之符亦有此請部議未行然識者避之

癸未

永樂癸未初卽位天順癸未南省火皆改於明年會試至崇
禎朝六會試竟以癸未終此亦數也

八股

康熙二年以八股制執始於宋王安石 詔廢不用科舉改
三場爲二場首場策五道二場四書五經各論一首表一道
判語五條起甲辰會試迄丁未會試皆然會左都御史王公
疏請酌復舊章予時爲儀制員外郎乃條上應復者八事
復三場舊制其一也尚書錢塘黃公機善之而不能悉行乃
止請復三場及寬民間女子裹足之禁教官會試五次不中
者仍准會試三事皆得 兪旨餘五事後爲臺省次第條奏
以漸皆復如寬科場處分條例復恩拔歲貢復生童科歲兩

考等是也

督捕

督捕衙門始兵部兼攝之順治甲午尚書王公未吉奏增設兵部督捕衙門滿漢左右侍郎各一員滿漢司官各六員後以太僕寺少卿協理旋改左右理事官秩四品視常僕少卿壽光魏昭華瑄以大理寺卿首遷督捕侍郎後以建言徙塞外卒至康熙三十八年復裁事歸刑部

特旨內陞

順治初太子太保永昌王公弘祚以戶部郎中修賦役全書加太僕寺卿書成陞本部侍郎至尚書其後工部營繕郎中霍叔瑾以大工加僕少至通政使順治乙未科予舉南宮之歲

洪士銘以經略輔臣文襄公子耿效忠以靖南王子世

祖特旨留部又特旨以京堂內陞洪以儀制郎中遷太常少卿遷太常卿耿以武選郎中遷太僕少卿至順天府尹

考選

黃訓讀書一得云羅豫章文質公撰遵堯錄稱宋仁宗明道中宰相欲除二親故為正言司諫帝謂祖宗法度臺諫官須宸選若自大臣除則大臣過失誰敢言者仁宗此言可以為萬世法

結銜

輟耕錄云中書右丞相伯顏所署官銜計二百四十二字明天啓中魏闡檀權倣縉紳為內官便覽首列已銜亦至二百

許字古來權奸如出一轍勺中志略云天啓中凡司禮監題
本年月之下上層排臣王體乾臣魏忠賢下層排梁棟李永
貞石元雅涂文輔諸人及刻內臣便覽體乾復讓忠賢居首
特高一字

漢軍漢人

本朝制以八旗遼東人號爲漢軍以直省人爲漢人元時則
以契丹高麗女直竹因及竹亦及木里闊及竹溫勃海八種
爲漢人以中國爲南人

義王

孫可望與李定國皆張獻忠義子冒張姓號東府西府後獻
忠敗死俱走入滇一人以爭權積不相能可望戰敗乃降

世祖皇帝方以文德柔遠封可望義王世襲賜第東長安門
外可望死其子徵灝襲封康熙十二年臺省以爲言下諸王
大臣九卿會議降封義公改慕義公蜀綿州鹿頭關龐士元
祠可望重修有石坊大書僞銜柱國太師兵部尚書凡數百
字猶稱張可望云

義字諡

明大學士高公穀諡文義二百七十年諡義者止此一人本
朝順治初大學士德州謝公陞卒諡清義

閣諡

本朝諡法閣臣不由翰林皆得諡文如洪公承諡文襄宋公
權諡文康王公永吉金公俊皆諡文通孫公廷銓諡文定衛公周祚

諡文清李公之芳諡文襄皆非翰林也

詹事府

國朝順治中設詹事府皆以漢人翰林官兼之止設滿洲詹事一員康熙初省十四年十二月十三日立皇太子府復設自詹事至正字滿人漢人各一員而滿人不兼翰林官初詹事府與九卿議政之列初設時失考故事久之乃復詹事次通政使大理卿之下少詹事次左右通政大理少卿之下然故事詹事與學士俱爲實錄等副總裁侍經筵今則有已遷正詹而仍爲纂修者御史言之竟未釐正二十二年沈宮詹釋堂移文吏部爭之是年春講始侍經筵矣

臣下私諱

晉咸和三年拜王舒爲撫軍將軍會稽內史舒疏父名會乞換他郡朝廷乃改會作鄒宜城有夷水以桓溫父名彝改蠻水後唐同光三年以郭崇韜父名弘改弘文館爲崇文館長興四年以馬贊父名不欲斥其家諱改同平章事爲同中書門下三品南唐元宗以董思安爲漳州刺史思安辭以父名章特命改名南州又後主嗣位以鍾皇后父名太章尊后爲聖尊后於禮君所無私諱爲臣下諱失禮意矣

宰輔編年錄

宋宰輔編年錄宋太常博士朱嘉徐自明撰起建隆庚申迄嘉定乙亥凡二十卷明呂邦耀又爲續錄起嘉定九年迄祥興二年凡二十六卷明雷鄭王李諸公各撰公卿等表吳郡

許重熙又為殿閣大臣年表近予從姊夫益都高梓嘗為續表迄南渡乙酉而止惜其無年著書散佚殊可惜也

賜御筆

康熙丁巳夏以御筆格物二大字清慎勤三大字石刻

賜日講官翰林院學士陳廷敬侍讀學士葉方藹侍講學士張英尋又賜英忠恕存誠等墨蹟又賜詹事府詹事沈荃龍飛鳳舞忠恕等墨蹟大字

講筵問答

丁巳春夏上日御弘德殿講書是時初進講通鑑講義上每先自講一過德音清朗義理貫徹每有詰問皆出意表一日問諸葛孔明何如伊尹陳學士廷敬對以諸葛亮三代

王佐伊尹之亞

上問諸葛亮成就如何比得伊尹陳對以所遇之時不同葉讀學方對云伊尹聖人諸葛亮大賢大

抵伊尹可比孔子諸葛亮可比顏淵上首肯一日講博

學之節上云知行孰重葉對云朱臣朱熹之說以次序

言則知先而行後以功夫言則知輕而行重上云畢竟

行重若不能行則知亦空知耳又一日講一日暴之節

上云古來君子小人不竝立君子進則小人退小人進則君

子退一定之理孟子此語說得最好

于成龍陸龍其

近日廉吏方面有黃州知府于成龍有司則嘉定知縣陸龍其于永寧人貢士陸平湖人庚戌進士陸後補靈壽知縣

特名爲御史于爲 上所深知數年中歷藩臬司使巡撫
順天辛酉歲入見賚予甚厚 上親製詩賜之有郊圻王
化始鎖鑰重臣膺之句尋擢兵部尚書總督江南江西

宋官制

宋初至元豐以前官制最爲繁猥六部九寺皆爲空官持以
寄祿秩序班位而別以他官判職事如兵部事歸樞密院戶
部工部歸三司設審官院三班院流內銓判吏部之事設判
禮部判貢院判禮部之事設判審刑院及詳議官判刑部之
事又有使有權使有權發遣使之名他如太常歸判司禮院
太僕歸羣牧司鴻臚歸客省之類官自官職自職名實舛互
范文正公在政府奏言今六尚書九卿之職皆權知權判無

一正官并是權假數易無定莫安其職如欲復三公九卿六
尚書之任則體大難舉願且命兩地輔臣兼領綱要仿周官
三公下兼六卿如召公領冢宰芮伯領司徒畢公領司馬遺
意又雜引漢制三公分部九卿唐太宗時宰相兼職掌以爲
證又條列審官流內銓三司司農寺羣牧司國子監太常禮
院三班院殿前馬步軍司審刑院大理寺刑部等職事并令
兩府兼判云云然以宰執分判六卿九寺更爲侵官至元豐新
制行六部置尚書侍郎而各以郎官屬焉九寺各置卿少卿
及丞簿之屬爲寺監官國子監置祭酒司業及丞簿之屬爲
學官又有御史臺有兩省通謂職事官以唐文散階換部寺
省監官歸釐本職如以金紫光祿大夫易吏部尚書銀青光

祿大夫易五部尚書正議大夫易列曹侍郎之類通謂階官而食其俸卽明制所本也但明制以六部合都察院通政司大理寺謂之九卿與詹事府俱得會議大政而太常太僕以下爲小九卿 本朝官制率沿明舊特於六部外設督捕隸兵部置滿漢侍郎各一員理藩院尚書一員侍郎二員又設宗人府正令以覺羅爲之府丞一員以漢人或漢軍爲之秩在副都御史下通政使大理卿上又設啓心郎二員以烏金超哈爲之後卽古之宗正也順治十六年裁去尚寶寺迄今裁未置震澤長語云宋制所謂官乃古之爵也所謂差遣乃古之官也所謂職乃古之加官也

國朝官制

國初內三院滿洲大學士謂之榜式烏金超哈官大學士亦

稱榜式如范文肅公甯文毅公是也六部初不置尚書率以貝勒管部事置侍郎以佐之有滿洲漢軍卽烏金超哈漢人各二員後置尚書久之又省去漢軍侍郎定爲滿漢尚書各一員侍郎各二員漢軍亦有爲漢侍郎者滿洲郎中員外郎初稱理事官副理事官後乃改從漢官之稱准協理兵部督捕太僕寺漢少卿二員改稱理事官科道初亦稱理事後改同漢人俱稱給事中御史云

宋四聖御押

格物要論載王魯齋押字跋云予觀司馬文正公之押署名而小花精神風致自然見於誠意之表唐末五季諸人押字莫不怪詭飄揚傾欹放蕩宜亂亡之相尋也昔人重押字至

有蒼萃刻石以傳者孫文定公廷顏山雜記載鳳皇山玉皇宮宋藝祖以下四聖御押惟仁宗泐闕因摹於此藝祖真宗太宗又真宗真宗

宋祠祿

宋士大夫多領宮觀食其祠祿予嘗以問葉讀學方初菴葉云宋置宮觀官罷官者領之俸食其祿亦宋朝忠厚之一端也予考之不然神宗熙寧二年王安石為參知政事創制置三司條例司始行青苗均輸等法出呂誨范純仁錢公輔鄭解等於外罷富韓公弼平章事是年始增置宮觀官丘文莊公世史正綱云王安石行新法而欲去異議者彼皆先朝舊臣素有聞望一旦去之無名乃為祠祿處之不知所為官觀

者所業何道為之使者所治何事而一時士大夫甘心受其豢養何耶此蓋安石增置之法非祖宗故事然終宋之世不改亦不典甚矣

大學士兼尚書

國朝入閣皆仍兼尚書銜惟康熙初益都孫文定公柏鄉魏公前後俱以吏部尚書大拜而不兼尚書其後復改內三院為內閣魏公得兼禮部尚書文定則告歸久矣

學士大拜

本朝以學士大拜者二人高陽李公丙戌進士戊戌大拜兼工部尚書孝感熊公戊戌進士乙卯大拜兼刑部尚書李年三十四熊年四十一

學士兼侍郎

瑣綴錄正統中陳高曹苗皆遙授各部侍郎仍供事翰林一時以為館閣盛事今內閣學士掌院學士例皆兼禮部侍郎不為異典矣

讀卷

今內閣九卿讀卷但擬十卷呈御覽各以首卷進呈候旨命讀則讀不命則否水東日記載景泰辛未廷試日陳閣老得三卷向南房紙窻圈點云則是明制讀卷官亦著丹黃今無此制矣又九卿但論衙門不論官之崇卑如己未魏雙鳳以督捕理事官壬戌科張鵬以通政司叅議皆得讀卷而宗人府丞太常卿等三品例不與翰林講讀學士多為收掌

官於事體殊未當也

先授編檢科道

世祖皇帝最重庶吉士每親自考較乙未館選丙申特先授漢書庶吉士王益朋王命岳等官六科給事中監察御史內祚遠授吏科給事中尋以族祖大學士正宗嫌改吏部主事戊戌館選己亥御試於南海子特先授清書庶吉士馬晉允富鴻業後改鴻基等十人為編修檢討而陳敬北通州人與今說巖禮侍同名皆同館也說巖尋奉旨加廷字殷觀光二人革職皆非散館故事

國朝狀元

國朝狀元多不永年中間惟丙戌傅閣學以漸丁亥呂閣學宮大拜卒己丑劉修撰子壬辰鄒修撰忠戊戌孫修撰承恩辛丑

池北偶談
馬侍讀^世皆不數年而歿豈氣數爲之耶孫修撰之歿
世祖章皇帝深悼惜之賜白金三百兩歸其喪蓋曠典也

三國貢物

康熙丁未夏荷蘭國甲婁吧王油頰嗎綏極遣陪臣卑獨攀
呵閏等入貢內有刀劍八枚其柔繞指旃檀樹四株各長二
丈許西洋小白牛四高一尺七寸長二尺有奇白質斑文項
有肉峰荷蘭馬四銳頭卓耳形態殊異又玻璃箱牡丁香叟
囉尼絨之屬是歲暹羅國王森烈拍臘照古龍拍臘馬嘑陸
坤遣貢使握坤司答喇耶邁低禮貢六足龜孔雀馴象等物
回回國貢牛三角三日云

國書之制

本朝文移書疏之制 國書則自後而前漢書則自前而後
凡宮城榜書率用清漢蒙古三體按草木子載元朝行移文
字漢字自前而後蒙古字自後而前畏吾兒字則橫書之

試卷稱名

宋呂申公試卷中自稱名王柏題其後謂古意尚存盛如梓
云淳化中立糊名之法祥符中立謄錄之制則又在申公之
前矣

伐木

江南造戰艦下令郡縣伐木洞庭民家孀嫗止一女縣吏至
其家伐木復令具舟送木至郡旣至郡候縣府道院查驗動
淹旬月嫗計無所出乃粥女以償諸費施彥執炙輟錄載宋

創都錢唐需林木甚大所在鼎沸鄧光祖知嚴州殊不經意
徐集各里正以朝廷所降木色丈尺人予一紙令各具界中
寺廟館驛官道木與所降色樣合者供之既供令匠往視皆
合令里正自伐官特予糧須臾木大集民間毫無所苦康熙
二十一年以太和殿大工凡楚蜀閩粵產木之地皆差部
員往採明旨嚴禁騷擾姚給事濮陽祖疏請禁伐祠廟冢
墓間樹得旨允行仁人之言其利溥哉

優老

通政使司叅議虞虞山世雲南昆明人以書受知世祖
皇帝特授光祿寺署正供奉內庭康熙十六年世瓔年八
十餘上念其先朝舊臣特自光祿寺丞擢本寺少卿遷

通叅久之御史或言其老病不任職上特令以禮致仕
仍給全俸二十一年雲南平世瓔疏辭俸祿且乞骸骨特
賜白金三百兩馳驛回籍途次貴州病卒

賜宴褒忠

康熙二十一年壬戌正月上元賜羣臣宴於乾清宮異
數也凡賜御酒者二大學士尚書侍郎學士都御史皆
上手賜通政使大理卿以下則十人爲一班分左右列命
近侍賜酒且諭醉者令宮監扶掖獨光祿卿馬世濟以文
鎮公雄子右通政陳汝器以贈兵侍前福建巡海道副使泰
子特名至御座側賜酒上之褒忠優厚如此翌日
上首唱柏梁體昇平嘉讌詩詩別羣臣繼和汝器句云勵節

褒忠感 賜觴蓋紀實云

御製詩

御製登城詩云城高千仞衛山川虎踞龍盤王氣全車馬往來雲霧裏民生休威在當前真帝王詩也

善果寺 御書

世祖御書賜弘覺禪師云洞房昨夜春風起遙憶美人湘江
水枕上片時春夢中行盡江南數千里唐人岑參詩也在都
城西善果寺

乘肩輿

本朝順治初漢人京官亦多乘馬予壬辰計偕入京師見高
郵王文通公每入朝皆乘馬其後始易肩輿三品以上用四

人肩輿四品以下則二人耳然旗下大官例乘馬無肩輿有
之自近年始宋朝野類要云百司出局人從先報上馬者蓋
舊禮只是乘騎自中興以來始得乘肩輿也建炎朝野雜記
云東都舊制耆德大臣或宗室屬近行尊者特旨許乘肩輿
建炎初上以維揚甄滑謂大臣曰君臣一體朕不忍使羣臣
奔走危地可特許乘轎塵史謂唐時宰相乘馬五代始用檐
子本朝近年惟文潞公以太師平章軍國重事司馬溫公始
爲門下侍郎尋臥疾就拜左相不可以騎二公竝許乘檐子
皆異恩也外官肩輿不用帷蓋蓋古褰帷之意今惟江寧開
封督撫司道府廳縣官皆用煖轎蓋沿宋明都城之制至今
未改耳

兼銜

翰林官遷吏部侍郎例兼翰林院學士至尚書則否其特用
為他部侍郎者亦不兼學士近如李容齋景遷戶侍項眉山
襄遷兵侍皆不兼銜惟葉文敏方以翰林院掌院學士
兼禮部侍郎加禮部尚書管刑部侍郎事此未有也又杜
肇餘臻以吏侍兼翰林學士服闋補刑侍遂不兼銜及再遷
吏侍亦不復兼學士則銓部之疎也甲子秋冬嚴存菴我以
詹事府少詹事董默菴訥以翰林院侍講皆超遷禮部侍郎
則兼翰林院侍讀學士其後王子言昌以正詹遷禮侍亦止
兼侍讀學士庚午予自少詹遷副都御史又遷兵侍亦不復
兼學士銜矣

宮銜

康熙元年已後大臣無加宮銜者惟閣臣高陽寶坻臨朐三
公以世祖皇帝實錄成晉宮銜其後宛平漢陽長洲三
公以太祖實錄聖訓告成亦晉宮銜甲子四月刑侍南
宮宋公文以老病乞休上嘉其廉慎特加太子少保致
仕丁卯四月巡撫直隸僉都御史于公成亦加太子少保皆
異數也

謁陵詩

康熙辛酉二月上謁孝陵諸公卿三品已上皆從多
賦詩紀事刑書蔚州魏公環溪象一詩極令人感動詩曰薊
門西望望皇畿共侍鑾輿展謁歸禮罷稜門雲自闔夢廻

寢殿淚頻揮老臣將去填溝壑何日重來拜翠微廿載承恩
無寸補鐘鳴漏盡尚依依予謂五六句最沁人心脾然是後
漢宦者張讓語耳

安南始末

安南入 本朝順治初莫敬耀來歸未受爵而卒授其子元
清爲都統使居高平黎維禔亦來歸未受封而卒康熙二年
遣編修吳光禮部司務朱志遠 諭祭維禔五年遣侍讀學
士程芳朝禮部郎中張易賁 冊封其子維禧爲安南國王
六年維禧奪元清高平地遣侍讀李仙根兵部主事楊兆傑
諭還之粵西孫延齡馬雄叛元清負恩助逆病死其弟敬光
爲黎氏所討來奔令地方官送歸本國死於泗城土府爵除

維禧死弟維禔嗣維禔死弟維禎嗣康熙二十二年遣侍讀
明圖編修孫卓冊封維禎爲安南國王仍 賜御筆扁額忠
孝守邦四大字又遣侍讀鄔黑禮部郎中周燦 諭祭兩故
王維禧維禔二禮並舉稱盛事云

周禮部使交趾詩

周禮部星公燦 陝西臨潼人自安南使歸有詩一卷頗見風
土粗載數首於此諒山南去萬峰稠細雨深林石徑幽一水
隨人千百折中宵勒馬問安州夜抵安州 回首燕臺不計程空山
坐待月初生乾坤自是無遺照行盡天南一樣明屯糜見月 一枝
挺出森青玉兩葉分披展綠雲名是千秋兼可噉長栽籬落
護山村千秋草 四圍山色映晴嵐此地交人號格甘竹樹參差

冬稻熟風光觸目似江南茶山早晴滄江岸上有荒祠移葉棉枝

近水湄短柱高龕雙錦鶴國俗祠廟以木雕雙鶴為侍報功異域禮同之

黎英王交之功臣城鎮人宸翰親揮日月光龍書鳳篆照遐荒交人奉比

義文畫首出中天頌聖皇刪封其六才名奕奕世無雙三譯常

思戴上邦別後懷君何處是寒風落日富良江爵別阮司馬公望黎司空

僖阮僉憲廷袞黃大參公寅關門曉日拜天顏得識南郊青瑣班記得

深林風雨夜多君相伴出茶山苗別阮廷柱武維匡宋儒陳壽四給事翠幹森

森傍水涯稍垂雀尾亂紛拏秋來結就檳榔果交子逢人代

煮茶檳榔樹衣冠文物重南疆何事關名太不祥題日畏天思

此義萬年帶礪控炎荒易鬼門關日畏天關周順治己亥進士庶吉士

林舍人使琉球詩

康熙甲子莆田林舍人玉巘嶼使琉球歸有竹枝詞一卷

周禮部同時示予并錄數篇以誌本朝文物之盛云手持

龍節渡滄溟璀璨宸章護百靈清比胡威臣所切觀風先

到却金亭明使臣陳侃建徐福當年採藥餘傳聞島上子孫居每逢

并服蘭閣問欲乞羸秦未火書日斜沙市趁虛多村婦青筐

藉絲莎莫惜籌花無酒盞人歸買得小紅螺足練明河牛斗

橫瑟瑟衙鼓欲三更思鄉坐擁黃紬被靜聽盤窻蜥蜴聲蜥

能鳴聲如麻雀三十六峰瀛海環怒潮日夜響潺湲樓西一抹青林

裏露出煙蘿馬齒山射獵山頭望海雲割鮮荆酒醉斜曛紙

錢挂道松楸老知是歡斯部落墳心齋生白室能虛棊几焚

香把道書讀罷憑闌笑幽獨藤墻西角對棕櫚廟門斜映虹

橋路海鳥高巢古柏枝自是島夷知向學三間瓦屋祀宣尼
王居山第兔園開松檉棕花倚石栽多少從官思授簡不知
若箇是鄒枚奉神門內列鵷行乞把天書鎮大荒喚取金
滕開舊詔侏儒感泣說先皇闕宮薨桷壓山原將享今看
幾葉孫二十七王禋祀在釐圭錫卣見君恩譯章會記荏
都夷爨木白狼歸漢時何似島主懷聖德工歌三拜鹿鳴
詩宗臣清俊好兒郎學畫宮眉十樣粧翹袖招要小垂手簪
花研帽舞山香望仙樓閣倚崔嵬日看銀山十二回笙鶴綵
雲飛咫尺不教弱水隔蓬萊織腰馬上側乘騎草圈銀釵折
柳枝連臂哀歌上靈曲月明齊賽女君祠久稽異域歲將徂
白笑流連似賈胡三老亦知歸意速時時風色相銅烏林康

熙庚戌進士與林同使者爲汪檢討舟次楫別撰中山沿革
志若干卷進呈御覽二君皆予門人也

徵聘不至

祭北海

周張後裔

臺灣開科

滿洲鄉試

漢尚書

閣臣

千秋康氏

暹羅表

太皇太后朝儀

裙帶官

衫

停止閏月

長白山

山東解元

崇禎紀事

縣名避年號

玄狐

遵化改州

鄉飲酒禮

卷四目畢

池北偶談卷四

談故

濟南王士禎阮亭著 高都姪廷掄簡菴較

親謁孝陵

康熙甲子冬

大駕幸金陵親謁明太祖孝陵

上由

甬道旁行

諭扈從諸臣皆於門外下馬

上行三跪九

叩頭禮詣寶城前行三獻禮出復由甬道旁行賞賚守陵內

監及陵戶人等有差

諭禁樵采令督撫地方官嚴加巡察

父老從者數萬人皆感泣總督兩江兵部侍郎王新命刻石

紀事己巳春南巡再

謁孝陵古今未有之盛舉也

殿試改期

國朝每科 殿試之期在三月十五日自辛丑科後以三月十九日爲 萬壽節遂改 殿試於二十日至今爲例壬戌科 駕幸 盛京謁 陵改 殿試於九月二十日戊辰科 以 大行太皇太后升遐改會試於二月十九等日 殿試改三月二十六日云

會試二亥

順治三年丁亥重行會試十六年己亥復重行會試

日講

今上親政後選翰林官直講 禁中先在 弘德殿後移於乾清宮講官始則熊賜履繼爲史鶴齡孫在豐張英徐元文陳廷敬葉方藹張玉書湯斌歸允肅大抵以掌院學士一員

與翰林官一員同講止二員惟戊午陳葉日講而 上幸南海子葉偶病假旬日以張代之後葉疾愈入直遂三員同直講史以編修歸歿於家特 賜祭葬其恩禮非外庭所敢望也

朝報

今之朝報或曰邸報亦有所本見王明清揮麈錄趙昇朝野類要云朝報日生事宜也每日門下後省編定請給事判報方行下都進奏院報行天下其有所謂內探省探衙探之類皆衷私小報率有漏洩之禁故隱而號之曰新聞蓋自宋時已然又六科 繪音冊子號晚帖以當晚卽知之次日乃登邸報故日晚帖亦有小報謂之小抄

臺灣府縣

康熙二十二年臺灣平設府一曰臺灣府縣三曰臺灣日鳳山日諸羅又設總兵官分巡廈門道各一員駐焉幅員之廣古未有也

東野氏世襲

康熙二十三年 上東巡周公後裔七十三代孫世襲奉祀生員東野沛然上疏願恩奉 旨交與該部禮部覆無庸議奉 旨周公承接道統繼往開來功德昭著其子孫應給職銜着九卿詹事科道會同確議會議得周公後裔應授官職撥給祀田修葺廟宇行文該撫查明以沛然世襲五經博士如孔顏曾孟仲氏例先是沛然上疏行在 上召問周公

姬姓爾疏稱東野何故沛然對曰昔魯公伯禽季子魚賜東野田一成因以爲氏 上曰周公廟庭何在對曰在闕里城東北二里 上悅隨 御製祭文遣 恭親王致祭禮部尚書介山 御前侍衛觀保鴻臚寺卿穆成格閩興邦太常寺寺丞張量馨山東提學道副使唐賡堯陪祭其後沛然卒子枝盛嗣爲博士云是時子貢後裔端木謙端木直亦上疏請部議不允

階官避家諱

予嘗疑六朝以來朝廷爲臣下避家諱至改州郡名者有之考愧郊錄乃知宋時律文有私諱冒榮徒一年之禁四銓之法遇磨勘階官之稱與其三代諱相值者許其自陳授以次

官謂之寄理遂以繫之官稱之首又李文簡燾奏疏亦載雍熙二年有詔凡除官內有家諱者三省御史臺五品文班四品以上許用式奏改餘不許嘉祐六年翰林學士賈黯知審官院奏准下太常禮院大理寺同議言祖父之名子孫所不忍道不繫官品之高下并當迴避乃詔凡府號官稱犯祖父名而非嫌名及二名者並聽迴避其後韓絳除樞密副使自言樞字與祖名下一字同乞避免不許遵嘉祐之詔也宋敏求提舉萬壽觀敏求父名綬自言壽字犯父嫌名詔改醴泉觀則嘉祐之詔復不行矣及吳中復提舉荆湖北路兵馬中復父名舉乞改稱提轄詔以朝廷官稱不當避守臣私諱遂不許然後知迴避私諱唐宋以前載在律文亦孝治天下之

意明代以來始刊削耳又燾疏引晉江統言其叔父春爲宜春令與縣同名故事職與祖父名同皆得改選而未有身與官職同名改選之例統以爲身名所加亦施於臣子凡佐史朝夕必稱厥官倘指實而語則觸尊者諱或詭詞迴避則以私廢公統以爲身名與官職同者宜與祖父名爲比武帝許之據此又不獨迴避先諱矣朝野類要云授職任而犯三代名諱者許避之而開禧初張嗣右除起居郎以犯諱辭免改名修注官其餘若一名偏犯則不避

武職丁憂

武職舊無丁憂之例康熙二十四年四川提督何傳疏言竊惟議禮制度聖王御世之大權地義天經人子立身之大本

養生莫如送死教孝所以作忠據夔州副將孫斌呈詳云通喪制禮既無貴與賤之殊沿例宅憂乃有文與武之別俱屬毛而離裏忍絕裾以滅親豺獮尚有一祭之知介冑豈無三年之愛臣久失怙恃見素鞞而興懷恭際休明瀝丹心而上請實天下萬世之公義非孫斌一人之私情伏懇特渙音定武職三年通喪之例垂光史冊云得命旨遂為定制孝治之隆夙絕千古矣

又浙江提督陳世凱上言武臣丁憂特其一節宜令讀書識忠孝大義得溫旨已後武臣俱當畱心典籍責令提鎮倡率之

訪遺書

康熙二十五年四月 上諭禮部翰林院自古帝王致治隆文典籍具備猶必博採遺書用充秘府以廣見聞而資掌故甚盛事也朕畱心藝文晨夕披覽雖內府書籍篇目粗陳而哀集未備因思通都大邑應有藏編野乘名山豈無善本宜廣為訪輯凡經史子集除尋常刻本其有藏書秘錄作何給值採集及借本抄寫事宜爾部院會同詳議具奏務令搜羅罔佚以副朕稽古崇文之至意旋又奉 旨關係經史方許採進時禮侍徐乾學疏進宋朱震漢上易傳并圖說十五卷宋張浚紫巖易傳九卷讀易雜說一卷魏了翁大易集義六十四卷曾種大易粹言十卷呂祖謙東萊書說十卷元金履祥尚書表注十二卷宋李樗黃樞毛詩集解三十六卷趙

鵬飛春秋經筵十六卷王與之周禮訂義八十卷蔡節論語集說十卷李燾續資治通鑑長編一百六十八卷唐開元禮一百五十卷共十二部

御書

康熙二十三年 駕幸闕里 御書萬世師表四字懸大成殿次年以四字頒行天下學宮又 御書白鹿書院額廬山白鹿洞并賜監本五經四書其河南府二程祠邵康節祠鳳翔府橫渠書院建寧府紫陽書院徽州府文公闕里長沙府石鼓書院皆頒 御書學達性天大字古今罕觀之盛舉也

毀淫祠

康熙丙寅擢江寧巡撫都御史湯斌禮部尚書掌詹事府事

湯瀕行疏毀吳下淫祠五通五顯劉猛將五方賢聖等廟恭請 上諭勒石上方山得 俞旨通行直省初湯以閣學遷巡撫過予邸舍予爲言吳中婦女好入寺院燒香首當禁止湯以爲然在吳遂力行之風俗一變若淫祠一節尤於世道人心裨益不小湯自言昔爲方面時只遵寧陵呂叔簡先生從政錄行之其撫吳亦此志云

戊己二官名

漢元帝初元元年置戊己校尉屯田車師前王庭班書師古注自甲至癸皆有正位唯戊己寄治今所置無常居故取戊己爲名或云戊己居中鎮覆四方今所置校尉亦處西域之中撫諸國也然戊己自是兩官後漢耿恭爲戊校尉關寵爲

已校尉是也

荷蘭貢物

荷蘭國自康熙六年入貢今二十五年臺灣平設郡縣其王
耀漢連氏甘勃氏遣陪臣賓先吧芝復奉表進貢表詞有云
外邦之丸泥尺土乃是中國飛埃異域之勺水蹄涔原屬天
家滴露云貢物大珊瑚珠一串照身大鏡二面奇秀琥珀二
十四塊大哆囉絨十五疋中哆囉絨十疋織金大絨毯四領
烏羽緞四疋綠倭緞一疋新機嗶嘰緞八疋中嗶嘰緞十二
疋織金花緞五疋白色雜樣細軟布二百一十九疋文采細
織布一十五疋大細布三十疋白毛裏布三十疋大白鳴鐘
一座大琉璃燈一圓聚耀燭臺一懸琉璃盞異式五百八十

一塊丁香三十擔冰片三十二斤甜肉荳蔻四甕廂金小箱
一隻內丁香油薔薇花油檀香油桂花油各一罐葡萄酒二
桶大象牙五支廂金鳥銃二十把廂金馬銃二十把精細馬
銃十把彩色皮帶二十佩廂金馬銃中用繡彩皮帶十佩精
細馬銃中用精細小馬銃二十把短小馬銃二十把精細鳥
銃十把廂金佩刀十把起花佩刀二十把廂金雙利劍十把
雙利闊劍十把起金花單利劍六把照星月水鏡一執江河
照水鏡二執雕製夾板三隻

四詹事

本朝詹事府屢裁康熙十五年立皇太子乃復設正詹兼
翰林院侍讀學士少詹兼翰林院侍講學士至故友華亭沈

文恪公荃始以講筵勞加禮部侍郎二十五年東宮出閣

讀書乃召江寧巡撫都御史湯公斌以禮部尚書兼詹事

時詹事為郭公棻少詹事為盧公琦歸公允三公皆仍其舊

故同時有四詹事未幾郭遷閣學即以湯為正詹不另補

東宮初出閣欽定講官五人湯郭二公外則滿洲正詹尹

泰少詹舒淑左春坊中允閆世左春坊贊善黃與也郭既遷

去以右春坊諭德徐潮補充之予以少詹事予告在乙丑

起復九月出閣在丙寅閏四月

趙昇朝野類要云已解官持服而朝廷特再推用者名起復

起復即奪情也今人以禫後即吉為起復者誤

試官

今諸司官初選即實授唯監察御史中書舍人必先授試職
一年滿內閣都察院方題實授沿明舊例也按明初范敏試
吏部尚書李寬試禮部尚書徐恢試戶部尚書茹常試兵部
尚書開濟試刑部尚書楊靖王邊試侍郎詹徽茹太素試都
御史又有試給事中至正德中陸完為試都御史此例今人
不知

入旗開科

入旗鄉會試開科始於順治辛卯壬辰至丁酉停止康熙己
酉庚戌復舉行至丙辰停止丁卯夏五月以亢旱肆赦再復
開科之例○按開科之例前後稍有不同順治壬辰乙未滿
洲蒙古用滿文另為一榜壬辰狀元麻勒吉爾江總督庚戌

癸丑滿洲蒙古槩用漢文卽附漢人通爲一榜辛未甲戌復開科例仍之

徵聘不至

康熙己未博學宏詞之徵內外薦剡百八十餘人不至者四人浙江應撫謙嗣寅江西魏禧冰叔山西范鄗鼎彪西陝西李顥中孚范登順治辛丑進士闡明絳州辛復元全先生之學與應李以理學著於南北唯魏以古文擅名其兄際瑞弟禮皆有詩名時號寧都三魏

祭北海

丁卯四月副都御史徐元珙疏請釐正祀典其略云臣按歷代祀典唐望祀北海於洛州卽今河南府也宋望祀北海於

孟州卽今懷慶府也明亦望祭於懷慶府我朝典制東海祀於萊州南海祀於廣州一祀近海誠爲允當西海則於蒲州望祭蓋西海遙遠循宋明之舊而望祭之宜也至北海則仍祭於懷慶夫宋都於汴而懷慶在其北彼時幽燕皆非宋土卽出國門而望北一祭亦權宜之計有明定鼎燕京仍往南而祭北海我朝因之殆非宅中以蒞四海之義什北鎮醫無閭山在奉天府屬今爲北鎮山海關迤北之海非北海乎況盛京發祥重地土厚水深源流綿邈皇上聲教四訖幅員之大亘古未有長白山水并烏龍鴨綠諸江亦盡朝宗於海則北海之祭不應仍在懷慶此祀典之急宜釐正者伏願治十七年科臣粘本盛題請改祭北岳於渾源

州祈下部議嗣後告祭更定於迤北近海地界云得旨下
九卿詹事科道會議上言明臣丘濬言京師東北乃古碣石
淪海之地於此立祠就海而祭爲宜濬所云碣石今在永平
府但我朝幅員廣大混同江水發源長白流入北海今北
海之祭應改混同江邊望祭可也得旨允行

周張後裔

康熙二十四年僉都御史姚締虞言宋儒周惇頤有開繼之
功下部議得旨以惇頤二十九代孫嘉耀世襲五經博士
二十六年戶科給事中汪晉徵言孔孟以來道學之統至宋
周程張朱而始著乃程朱二氏久置世襲博士周惇頤子孫
亦爲博士其張載子孫應一體卹錄云九卿等覆議順治十

二年八月據江南布政使司呈請朱熹裔孫煌禮部題授世
襲五經博士康熙九年五月禮部覆御史傅世舟疏題授二
程裔孫程宗昌程延祀世襲五經博士二十四年四月九卿
詹事科道會議僉都御史姚締虞疏題授周惇頤裔孫嘉耀
世襲五經博士張載關中大儒與濂洛並重載裔孫亦應照
例授世襲五經博士陝西巡撫副都御史布哈疏請以載裔
孫張夢熊應詔夢熊未及襲而卒以其子從先爲博士

臺灣開科

康熙丁卯夏四月福建提督張雲翼疏請臺灣鄉試宜照甘
肅寧夏例於闕場另編字號額中一二名禮部覆准臺灣新
經歸附文教初開應將臺灣一府三縣生員照甘肅寧夏之

例另編字號額外取中舉人一名得旨允行是科五十一名蘇峨鳳山縣附學生習易經

滿洲鄉試

丁卯夏 恩詔入旗滿洲蒙古漢軍原有定例同漢人一體開科取士前因用兵暫行停止今仍照舊舉行禮部題請於直隸舉人額外滿洲蒙古取中舉人十名另編滿字號漢軍取中舉人五名另編合字號漢軍稱烏金超哈故也會試亦於漢進士額外滿洲蒙古取中四名漢軍取中二名皆與漢人一體作文考試 盛京生員附入在京八旗本年鄉試期迫俟庚午辛未科舉行云

漢尚書

順治初始設漢尚書吏部陳名夏戶部謝啓光禮部李若琳兵部劉餘祐刑部党崇雅工部張鳳翔都察院掌院事左都御史房可壯後惟陳党二人拜相

閣臣

世祖時拜相者自同安洪文襄承疇外直隸四人涿州馮文敏銓靜海高文端爾儼大名成公克鞏高陽李文勤爵江南四人溧陽陳公名夏武進呂公官吳江金文通之俊高郵王文通未吉山東四人德州謝清義陞掖縣張文安端安丘劉公正宗聊城傅公以漸山西二人曲沃李公建泰衛文清周河南一人商丘宋文康權陝西一人寶雞党公崇雅浙江一人海寧陳公之遴四川一人井研胡公世安康熙已來拜相者直隸四人柏鄉魏公介裔寶坻

杜文端立宛平王公熙真定梁公清江南五人長洲宋文恪

德崑山徐公文元丹徒張公書玉合肥李公天桐城張公英山東

三人益都孫文定廷臨朐馮文毅溥武定李文襄之山西一

人沁州吳公璣湖廣三人孝感熊公履漢陽吳文僖正大冶

余公柱浙江一人錢塘黃文僖機熊公罷相後再起為禮部

尚書己卯復相

千秋康氏

本朝順治已來直省民間一產三男者歲有數十多不勝紀
定例官給米三石布十疋而已按南唐時金陵人康國輔娶
司馬氏一產三男唐主以為瑞皆封將軍號千秋康氏柳子
厚集有為廣南鄭尚書奏百姓一產三男狀侈為休徵想爾

時此事絕少故以為祥瑞而優異如此

暹羅表

康熙二十三年暹羅國進表云啓奏 大清國 皇帝陛下
下伏以聖明垂統繼天立極無為而治德教孚施萬國不動
而化風雅澤及諸彝巍巍莫則蕩蕩難名卑國世荷 皇恩
久沾德化微臣繼襲踐祚身屬遐方莫能仰瞻 天顏幸遇
貢期敢効輸款顛遣正貢使坤字述列瓦提二貢使臣坤巴
實提瓦扃三貢使臣坤司吝塔瓦渣正通事坤思吝塔披彩
辨事文披述塔新禮嘑等梯航渡海齎捧金葉表文方物譯
書前至廣省差官伴送京師朝貢進獻代伸拜舞之誠恪盡
臣子之職恭祝 皇圖鞏固 帝壽遐昌伏冀俯垂鑒納庶

存懷遠之義微臣瞻天仰聖不勝屏營之至

太皇太后朝儀

舊制元旦冬至及

太皇太后

皇太后萬壽節

上詣

兩宮行禮大學士尚書都統已上隨

駕詣宮

前行禮侍郎已下則否二十年御史任某條奏部議隨駕官如故侍郎已下於午門前行禮遂爲定制

裙帶官

宋時親王南班之婿號曰西官又謂之裙帶官見朝野類要

而

衫水在予邑東鄙古西安城下又姓也左傳文公十一年宋公於是以門賞衫班漢書功臣表有芒侯衫跣劉熙釋名曰

耳衫也

停止閏月

楊光先者新安人明末居京師以劾陳啓新安得敢言名實市僧之魁也康熙六年疏言西洋曆法之弊遂發大難逐欽天監監正加通政使湯若望而奪其位然光先實於曆法毫無所解所言皆舛謬如謂戊申歲當閏十二月尋覺其非自行檢舉時已頒行來歲曆至下 詔停止閏月光先尋事敗論大辟光先刻一書曰不得已自附於亞聖之闕異端可謂無忌憚矣○王蜀閏丙戌年正月後因胡秀林向隱異同未得唐曆乃閏乙酉年十二月遂改用之宋元豐元年歲在戊午閏正月知定州薛向繳進遼國曆乃在十二月古亦有此

見吳曾漫錄

長白山

內大臣覺羅武等謹題爲遵 旨看驗長白山事康熙十六年四月十五日內大臣覺羅武 一等侍衛兼親隨侍衛首領臣耀色一等待衛臣塞護禮三等待衛臣索 奉 上諭長白山係 本朝祖宗發祥之地今乃無確知之人爾等四人前赴鎮守兀喇地方將軍處選取識路之人往看明白以便酌量行禮臣等欽遵 上諭於五月初四日起行本月十四日至盛京十六日由盛京起行本月二十三日至兀喇地方轉宣 上諭於將軍等隨查兀喇寧古塔及兀喇獵戶所居村莊等處俱無確知長白山之人僉云會遠望見惟都統

尼雅漢之宗族戴穆布魯原係採獵之人今已老退閑日稱我輩原在額赫訥陰地方居住我雖不曾躋長白山之巔曾聞我父云如往獵於長白山脚下獲鹿肩負以歸途中三宿第四日可至家以此度之長白山離額赫訥陰地方不甚遙遠我不知其他等語因訪問雖不曾至長白山如赴額赫訥陰地方水路幾日可至陸路幾日可至亦有知往額赫訥陰地方陸路之人否據管獵戶噶喇大額黑等口稱如乘馬由陸路前赴額赫訥陰地方十日可至如乘小舟由水路而往途中全無阻滯二十日可至倘遇水漲阻滯難計日期有獵戶喀喇者知赴額赫訥陰地方陸路等語臣等隨議每人攜三月糧而往又思或二月糧盡或馬匹倒斃不能歸家亦不

可定隨語鎮守寧古塔將軍巴海可載一船米於額赫訥陰
地方豫備倘我輩米盡以便於彼處取用將軍巴海云大船
不能過松阿里河大險處當卽載米十七小船至額赫訥陰
地方豫備臣等卽擬於六月初二日起行又思由水路而往
倘遇水漲阻滯稽遲時日不能卽至因與噶喇大額黑約我
輩乘此馬四肥壯速由陸路往看俟看過長白山回時再由
水路逆流而上前赴額赫訥陰地方約定臣等帶領固山大
薩布素於六月初二日起行經過文德痕河阿虎山庫勒訥
林祁爾薩河庫沱河沙布爾堪河納丹佛勒地方輝發江法
河木敦林巴克塔河納爾渾河敦敦山卓龍窩河等處及至
訥陰地方江干不意噶喇大額黑乘小舟而行半月程途七

日齊至因語固山大薩布素我輩乘小舟由江中逆流前赴
額赫訥陰地方汝帶領官兵馬匹由瓦努湖河逆流而上由
佛多和河順流而下前來額黑訥陰相會約定遣發去後臣
等於十一日至額赫訥陰地方固山大薩布素等於初十日
已至因前進無路一望林木臣等與固山大薩布素商議令
薩布素閒散章京喀達與識路徑之喀喇帶領每旗甲士二
名前行伐木開路并諭如望見長白山可將行幾日方得望
見有幾許路程相度明確來報我輩住二日亦卽起行矣隨
於十二日遣發前行去後本日據固山大薩布素差人顧素
前來報稱我等別大人們行三十里至一山頂上望見長白
山不甚遙遠似止有一百七八十里等語又續差艾喀來報

稱先差人來後又至一高山頂上望見長白山甚明約有白
餘里山上見有片片白光等語臣等趁未有雨水之時急往
看驗長白山因畱噶喇大額黑督捕珠珙於十三日起行十
四日與固山大薩布素等會於樹林中揣摩開路前進十六
日黎明聞鶴鳴六七聲十七日雲霧迷漫不見山在何處因
向鶴鳴處尋路而行適遇路蹊由此前進直至長白山脚下
見一處周圍林密中央平坦而圓有草無木前面有水其林
離住札處半里方盡自林盡處有白樺木宛如栽植香木叢
生黃花燦爛臣等隨移於彼處住札步出林外遠望雲霧迷
山毫無所見臣等近前跪誦 綸音禮拜甫畢雲霧開散長
白山歷歷分明臣等不勝駭異又正值一路可以躋攀中間

有平坦勝地如築成臺基遙望山形長闊近觀地勢頗圓所
見片片白光皆冰雪也山高約有百里山頂有池有五峰圍
繞臨水而立碧水澄清波紋蕩漾殊爲可觀池畔無草木臣
等所立山峰去池水約有五十餘丈地週圍寬闊約有三四
十里池北岸有立熊一望之甚小其繞池諸峰勢若傾頽頗
駭瞻視正南一峰較諸峰稍低宛然如門池水不流山間處
處有水由左流者則爲扣阿里兀喇河右流者則爲大訥陰
河小訥陰河繞山皆平林遠望諸山皆低相視畢禮拜下山
之際峰頭有鹿一羣他鹿皆奔獨有七鹿如人推狀自山峰
陸續滾至山下閒散章京畢楊武里等駐立之處臣等不勝
駭異因思正在乏食此殆山靈賜與欽差大臣者隨望山叩

謝收其七鹿臣等上山之時原有七人也自得鹿之處退至
二三十步回首瞻望又忽然雲霧迷山臣等因清淨勝地不
宜久留於十八日言旋回見先望見長白山之處因雲霧蒙
籠遂不得復見山光矣二十一日回至二訥陰河合流之處
二十五日回至恰庫河此河乃訥陰東流會合之所二十八
日正行之際適遇頒到 敕旨臣等不勝歡抃捧讀 敕旨
感激靡盡當經叩頭謝恩訖二十九日因馬瘦不堪馳驅自
恰庫河水路乘小舟而歸經過色克騰險處圖白黑險處噶
爾漢險處噶大渾險處薩滿險處薩克錫險處法克錫險處
松阿里大險處多渾險處乘一葉小舟歷此大江九險得以
無恙而渡者皆仰賴 皇上洪福之所致也七月初二日

回至兀喇地方又往看寧古塔等處地方於本月十二日至
寧古塔徧看會寧府等處地方畢於七月十七日自寧古塔
起行八月二十一日抵京師 等奉 命於人跡罕到之處
創闢路徑行於不見日色深林之內無一日阻滯得見長白
山皆我 皇上敬念 祖宗誠心感格神明之效也緣係
欽差事宜謹疏奏聞奉 旨長白山 祖宗發祥重地奇蹟
甚多山靈宜加封號永著祀典以昭國家茂膺神貺之意着
禮部會同內閣詳議具 禮部覆疏金史大定十二年封長
白山為興國靈應王明昌四年又加封開天弘聖帝明洪武
三年竝去嶽鎮王公封號止稱為神今 本朝祭五嶽五鎮
俱稱嶽鎮之神相應將長白山封為長白山之神相擇吉地

建祠照五嶽例每年春秋二季致祭祭祀所行禮儀應用等物亦照五嶽今未建祠之前應特遣大臣往封致祭其封神祭文及每年春秋二次祭文交與翰林院撰擬工部酌量題請建造祠宇成日始行春秋二祭可也奉旨這建祠致祭事宜着再詳議具奏

山東解元

山東解元在明時仕多不達至順治戊子吾邑伊中丞翁菴闕以乙未改翰林授御史今至節鉞甲午大高趙庶常浮山舟以己未丙午鄆城魏侍讀子相希以丙辰壬子濱州王檢討甲先鼎以癸丑乙卯德州李編修紫瀾濤以丙辰丁巳諸城王編修何思浦以己未辛酉德州孫檢討子未勳以乙丑

丁卯陽穀劉庶常瑛以辛未凡歷十五科而入翰林者八人

崇禎紀事

崇禎紀事吳郡姚宗典所著其中紀載多失實而獨於宜興故相盛稱其功又見弘光大記一書亦多出傳聞如云某年月日劉澤清殺其叔孔和孔和長山故相國青岳先生鴻訓子部領義兵至淮澤清忌而殺之非其族也又云流賊偽制將軍某至濟南推官鍾性樸死之鍾字文子順天人癸未進士本朝順治初為濟南府推官後擢提學道予即其庚寅首取士也而謂死流賊之難何也

縣名避年號

順治中改嘉興府崇德縣為石門縣以避太宗年號也

明穆宗朝亦改隆慶州爲延慶州許重熙五陵注略曰宋時皆改郡邑名以就年號如祥符興之類國初亦以洪武名其門避年號非古也

玄狐

本朝極貴玄狐次貂次捨獬獬玄狐惟王公以上始得服康熙十一年重定衣服等威之制三品以上始得服貂及捨獬獬未久復故日講官每歲賜貂自滇中告變停賜康熙十九年乃編賜講官九人

遵化改州

康熙十六年以孝陵故陞遵化縣爲州以豐潤縣屬之知縣鄭僑生卽陞知州後歷官湖廣提學僉事

鄉飲酒禮

康熙己酉順天府尹疏請八旗一體行鄉飲酒禮從之

池北偶談卷五目錄

談獻六之一 凡二十四則

朱公遣婢帖

畸士

申殷張

韓計

張學士

駱金吾

左良玉

張徽

王烈女

葛端肅公家訓

薦隱逸

蔡卞白敏中

聯語

先忠勤公家訓

忠勤公諸孫

司徒公歷仕錄

方伯公遺事

方伯公同學

方伯公答人詩

方伯公知人

侍御公殉節

王劉二奇士

節義

封丘古蹟

五目畢

池北偶談卷五

談獻

濟南王士禛阮亭著

高都姪廷掄簡菴較

朱公遣婢帖

總河尚書義烏梅麓朱公錫之溫然長者以清慎受知世
 祖皇帝後齋志以歿又無嗣子近見公遣婢帖真盛德事錄
 之以示後生知前輩用心如此帖云前送回張氏女子原無
 大過只是娃子氣好言教導不甚知省誠恐聲色相加流入
 婢子一類所以量給衣飾還其父母初時原是待年五六月
 後便有遣歸之意故自後并無半語諧謔猶然處子也而此
 女臨去時哭泣甚悲既恐人笑又恐人不相信不肖甚憐之

足下可將此女原無大過完璧歸趙一段緣由向其父母中
媒昌言明白以便此女將來易於擇婿也康熙中徐亮淮揚
間人盛傳朱公死爲河神十一年總河王中丞徇民情疏請
建祠濟寧下部議寢其事按公此事與宋張乖崖及明左都
御史沂州王公璟事略同王事見西園雜記

畸士

杜牧之所記燕將錄陳同甫所記龍伯康趙九齡事宋景濂
所記秦士錄近日錢牧齋所記東征二士錄皆瑰瑋侷儻鼎
革之際不乏畸士友人汪荅文劉公敏皆在乙邦才傳汪又
作沈通明申甫傳予常作劉孔和傳每欲廣搜成一書未暇
也

申殷張

永年申和孟涵節愍公長子有文章志行以詩名河朔間同
學多爲大官申獨隱居不出有故人自京師寄書申報以詩
云日日秋陰命筍輿故人天上落雙魚荷花未老新醪熟爲
道無閒作報書其簡傲如此一時同隱者羊山中者有殷岳
宗山張蓋覆輿殷工五言古詩平生不解爲近體常爲睢寧
令輒自罷歸張善草書通輕俠晚值亂離鑿坏以居不與人
接人有偵之者或夜讀經傳達旦時或痛哭張贈申詩云草
澤賢豪盡上書奎章閣外即公車我昔漁父因衰老獨有涵
光是隱居後發狂死和孟爲立傳刻其遺詩二卷

韓計

北平韓鼎業字子新流寓中州李空同墓在禹州山中為流賊所發韓收其骸骨葬之吳江計考廉甫草東遊河北訪謝榛墓於鄴西門外為立碣表曰明詩人謝茂秦墓二事皆有古人之風按空同山在禹州與具茨接獻吉本扶溝人且生於汴故取為號歿即葬焉非平涼之空同山也

張學士

辛亥秋 駕將出關謁 陵又有遣大臣巡察之議侍講學士張貞生於乾清門而奏言過慙下考功議革職為民蒙恩止鐫二級於九月廿二日扁舟南歸學士居富川有講學園即文信國故居也一時賦詩贈行者甚多未勅按察云三殿衮衣何事補西江遷客累朝多高念東侍郎云讀書學

道千秋事士所當為正自多家兄西樵云言聽便為天下福計違不負一生心學士畱別詩云秋風送客復乘船江遠帆孤一夢懸焚草燈前期報國披肝殿上願回天聖明豈是誠難格臣慙還應術未全賴有宗工交勗勉臨岐申贈繞朝鞭張為國子司業時刻鄒南臯先生宗儒語略頗闡陽明良知之說其後乃一宗考亭嘗書邸壁云至危是人禽之介喫緊在義利之關居京師寓吉安館中蓬蒿滿徑突無炊煙瀕行至不能具裝故人餽贐一無所受其狷介如此予亦贈詩三首其一云上殿似聞辛慶忌行吟休擬楚靈均學士尋奉特旨名用 聖主知人之明度越千古矣

駱金吾

駱養性字泰如京師人崇禎朝為大金吾熊魚山開元姜如農
塚二公俱以直言得罪下錦衣獄一日漏下二鼓一小中官
持懷宗御筆至云諭駱某即取熊姜二犯絕命繳駱附奏繳
旨略云言官果有罪當明正典刑與天下共棄之今昏夜以
片紙付臣殺二諫官臣不敢奉詔奏上帝怒為之霽二公皆
得不死駱至順治中尚在宋荔裳嘗識之

左良玉

左良玉偃蹇武昌不奉朝命其東下以討馬阮為名實叛逆
也侯方域為寧南侯傳以私恩語多失實論者猶以是予之
董卓傳卓既廢立乃與司徒黃琬司空楊彪俱帶鐵鎖詣闕
上書追理陳蕃竇武及諸黨人以從人望古來奸賊依倚盜

名類同一轍如此

張敞

廬陵張幹臣學士貞生世祖敞明成化時仕為後軍都督府經
歷嘗以救林見素得罪與陳白沙交善予從學士處見白沙
送別詩手蹟云草閣春風忽兩人坐臨江水看江雲尋常肝
肺詩中寫六十頭顱鏡裏分落絮風驚還著樹行人日出又
離羣布帆遠下南京道望斷梅關不見君張氏以理學直諫
為家學其淵源有自矣

王烈女

張秋王烈女名嬌諸生王碧侯女風姿絕世而駘宕不羈崇
禎辛巳冬張秋被兵將犯烈女女大罵而死血凝河冰經春

不化

葛端肅公家訓

德平葛端肅公爲明嘉隆間名臣東阿于文定公稱大臣有
德望者獨推公公與予家世相婭先太師公長女公孫婦也
嘗讀公家訓謹錄數則於左○予初仕爲彰德府推官視府
篆遇冬至在趙王府慶賀畢王傳令旨各官卽以朝服見予
謂朝王舊禮皆吉服今遽更變不敢從王令長史持一冊來
云此書開載應朝服予謂旣非沿習又無素考一旦改度理
不可從所持不知何典記未可遽信長史復啓王大怒將引
禮官拷掠欲以恐喝長史復來云殿下盛怒不具朝服恐不
容見予曰不見亦得卽請於朝違令旨之罪亦可認若不應

服而服則關係甚大各官罪不可測聞寧藩初令各官朝服
惟李夢陽不肯事竟如何長史往復良久日已高王遂令照
常吉服朝見後見崔後渠公云不圖子有是識有是力也○
予在鄴三年餘每公出必自齎盤費縣驛私餽下程俱不敢
受嘗至汴城查盤事畢以餘金買銅茶壺一具遇大風雪黃
河冰不可渡待於河上仍鬻壺以爲途費今聞里甲驛遞之
費至於不可紀極如之何民不貧困流亡也○予遇急缺風
憲行取時年二十九歲限以十月到部舊例選科道二十以
上方得與若遲兩月卽合例予平生謂處事最不可用意纔
用意便非順天命故依限赴部呂文選從周詒曰君年二十
九例不得選臺省予曰自知無分居數日授兵部主事守山

海關冢宰汪誠齋語左都御史王浚川公曰葛君年二十九更兩月則及格矣渠不肯候是其人亦可取公曰是予山東提學時門生也在彰德甚有聲崔後渠亟稱之公又語予曰君不謀臺省良有見居官何必臺省能稱職卽是好官耳○予鄉平度李正夫以文選副郎改翰林部例一人出衙門則舉同鄉一人爲代武城王舜渠及邢北原先薦予於正夫正夫遂告之冢宰文選皆曰可予素不識正夫特相過訪屏人曰今見鄉兄吾所舉可謂得人且曰呂東匯欲兄一見予有難色正夫又曰兄謂銓曹不易見耶我當同兄一往予曰否否旣已見矣則當有言是涉於求吾弗能也正夫曰今求者多以爲事當出於某故皆不得而兄顧以一見爲難乎予曰

鄙志以爲不可求故不能從正夫又曰昨王道思薦李中麓東匯謂某已薦兄今胡如此予曰中麓兩同年也素相厚得吏部猶我也況中麓不在京師豈可令士大夫謂某潛與之爭乎請鄉兄遂薦之正夫乃悵然罷去於是泇川中麓矣予詣正夫謝相負之罪正夫曰予初不知兄之高如是山東正氣也吾重之有加於代吾爲吏部矣郭君弼亦稱道以爲君子立身當如是後中麓以文選陞太常值予服闋以予前相讓之意仍欲薦予與冢宰許松臯公暨文選王象山嘉賓言皆允乃作書促予北上時以日淺不可遂行比至都有舊吏部林東城春周棗山卿皆以起復先至中麓甚憾予遲旣數日偶吏部有胡縷溪鯨者不爲衆僚喜議欲出之於外以爲

予地中麓間來語予予曰擠人而奪其位此豈君子之心果如所云予當乞病歸必不忍就也且前日吾能讓兄今顧可攘人乎中麓曰迂哉葛子予曰誠然寧迂勿躁也中麓意乃止越數日祠祭主事缺乃補之○予在山海時陶真人仲文以遼陽庫官任滿回夾帶軍妻至關詰出予發巡捕指揮徐鳳儀問究軍妻解回原衛仲文家人依律問擬追問渠甚啣之渠妻與關民張鸞妻結爲姊妹仲文至京有真人之寵鸞與妻遂相往來徐是山緯守關因盤詰武定侯郭勛家人被其誣奏至於逮係仲文語人曰山海主事亦可拿乎意蓋在予也時予以起復至京詹角山語予曰此人不可不防予曰禍福固有定數不能宛曲求解聽之而已予尋補禮部遷選

制郎中仲文時加禮部尚書擇日來部到任予與衆僚議不可相見是日當託故皆不入部衆以爲然至日渠來見四司無人各畱一名帖而去竟亦無如之何也○寧府宸濠反同謀者郡王將軍而下若干人本犯皆令自盡家屬發高墻禁錮後命科道官各一人至彼看議姑容回本府爲庶人既得脫禁輒復營謀請封夏桂洲掌禮部時爲之題覆酌量俱准襲中尉女皆爲鄉君已封若干人矣予在儀制有接踵奏請者予查刑部移來原題稿其祖若父皆親同謀反人遂具稿叅駁呈嚴介溪宗伯嚴曰此事桂洲久已准行今遽變易桂老在閣豈不取怪況予亦江西人先已准封我乃叅之人其謂我何予曰郎中亦知桂翁在閣翻異所行必當致怒然法

不可行只得據正題覆意外之禍聽之而已既具題桂洲竟擬旨云某等你部裏既查係謀反者子孫都不准襲今後再有奏擾的治罪不饒全無怒意蓋亦自知先題准之非得此一解亦無後虞也○寧藩逆廢只令弋陽王以本爵管理府事渠乃無涯之心萌初求審理理刑吏部題覆與之既以教授輔導職卑恥同各府奏欲以審理輔導予在儀司叅之以爲郡王府止有教授親王乃有審理弋陽王雖理府事爵實郡王據稱添有審理已爲非分今又卑薄教授欲以審理輔導理刑之官非可以兼輔導若如所請將來隴蜀之請又不知其如何所據弋陽王拱橫非望奏瀆祈天語嚴加戒飭雅宜安分恪守成憲無得仍前妄意奏擾自取罪愆奉旨是拱

橫屢有奏擾不務安靜着今後恪遵憲章保守祿位毋得聽信撥置自取罪愆明旨昭然宜知警戒各衙門亦當稍知裁抑矣未幾奏乞長史吏部郎選與長史二人又乞校尉兵部又題與校尉五十名其校尉巾帶奏乞照例給與事在儀制司予諭其齎本人曰親郡王各有體制原不相同今弋陽王欲全比親王是入繼親王也何謂以本爵管理府事汝速歸啓王宜安分吾決不與渠曰兵部已與校尉校尉應有巾帶予曰此自兵部大錯校尉可有巾帶決不可得後長史亦竟被言官叅革云○予自陝西布政使入覲帑羨一無所攜有時相子官太常尚寶同衆邀飲亦只照常送一帕儀吏白他省藩司未嘗有以此送嚴管家者而顧以貽其主人恐嗔怪

予曰厚則吾力實有不能相諒與否聽之而已嚴管家者分
宜家人嚴年也○巡撫培養一方元氣不比巡按專有發奸
擿伏之任故貴寬簡長厚予在河南只重循良有司不獎喜
事獵虛名者更嚴禁貪酷之吏常刻木榜曰爾之俸薪皆出
於民更殘民以逞取充囊橐不有明罰必有幽責不於其身
必於其子孫後予在吏部佐中外考察數四舊屬官鮮以貪
墨敗者不可謂無所感乎也然待人而與猶屬庸士若豪傑
則自知砥礪矣勉之勉之○予在吏部四載餘兩推太宰一
次相公各有所託且曰卽以元輔次輔所薦爲正陪予謂冢
宰統百官均四海一遂柄用大關君子小人之進退須從人
望烏可徇人竟推南太宰周公延疏上大拂時相意得調旨

另推兩員來看二公復中前請謂閣中已秘揭薦過非此二
人不可予不能從明日東闕會推更推總憲屠公僑一廷相
顧不言而罷予徑出至端門楊虞坡兄趨來同行曰今日之
舉正人增氣多矣兄不見環聽者悚然乎疏上相公大怒果
各具揭薦所囑者且云吏部偏執意見越三日疏揭俱不發
聞上共納袍袖中左右莫測又數日忽宣召吏部守禮趨至
迎和門中官捧御筆特旨出批部疏面云着默復職之任默
者福建李古冲時家居故云聖明總攬乾斷不惑私議兩相
受上眷知之深費許多心計竟不能用一私人豈尋常世主
所及哉○陶仲文旣荷寵異常入直萬壽宮時於便殿賜坐
賜食從容談論聞上兩次詢大臣臧否至守禮則先發云此

朕所素知是在禮部山陝河南有聲者聞他清操如故陶出
輒恚憤累日語其徒曰葛與川公好造化上每訪問諸大臣
便先稱之蓋修舊怨不能遂其中傷也此自鬼神呵護然聖
德高明埒於大造吾子孫當世知所以報稱可也○丙辰自
南京謝政歸里舊宅已推與弟姪輩始自營第一區檢筭中
得二百餘金杏莊上畜糧僅數百石於是年期起室一進約
數年竣工興作之費每至稱貸爾輩其知締造之艱兢兢保
守之此宅以有家廟家塾幾世未析百口同居勢不得不從
闢大以後子孫出居每宅寬只許五楹深約三四進勿妄扳
援此宅規制其同爨弟姪輩欲新居時除爾曾祖見產瓜分
之外各與城宅一區鄉莊一所田二頃塋地數畝以稱予親

親之誼○予在仕途三十年今得優游林下於世味淡然相
忘似皆得簡靜力士大夫但有爲名使人喜之心做官就要
矯激自炫以急人知煦煦行惠至違道以要虛譽居鄉必不
能修己遠利表正風俗卽知自好亦多甘爲鄉愿之行俟命
君子所謂無入而不自得蓋以立身行己自有法度對不自
失而言耳顧居鄉無難只要在家讀書靜坐不管閑事敦倫
理屏嗜慾勿干請有司禁絕假託用勢者耳若做官要做入
事事念念爲義爲公成敗利鈍皆無足計須先知內外檢點
卓然自立不依阿泯忽附人持法公平宅心忠恕勿恃一守
而輕儕慢民勿爲宦成而肆志傲物兢兢翼翼作事謀始凡
自我行務上有益於朝廷下有利於生民而無求赫赫之名

其庶矣大凡人能清約卽能秉正事無不可爲夫出處一機爾輩自今卽學廉靜無欲異日居官自當得力使人稱爲清白吏子孫可矣○又二則曰同年中天植忠直吾不如郭君弼嘉靖癸巳十月予行取至京君弼爲御史暇則相見十二日夜星隕如雨無一人建言者五日後君弼過我曰兄能爲程舜敷否予曰兄欲爲楊實卿乎蓋楊曾論邵真人下獄追主使之人竝逮舜敷不隱得謫故感及君弼因曰星隕大變舉朝無言者我言官也敷日來甚不得已已草奏矣兄爲我討論之疏上三日不下君弼復過曰事不測矣少頃速錦衣獄復奏上著拿來午門前打四十棍錦衣夾拶已近百矣兩腿露骨死而復甦予視之初無悔意旣而巡按蘇松趙好別

弊臨滿止爲朱玉峰建一坊題曰崇德爲文衡山建一坊題曰表節雖顧味齋在閣中亦不及也後遷順天巡撫時夏桂洲起用南來各巡撫皆候境上保定巡撫蘇舜澤以書邀君弼君弼辭之未幾以地方小事票令閑住旣以太宰熊北源薦起督宣大總兵張達輕出犯敵營陣亡事出頃刻君弼駐陽和相去二百里比夜始知給事中唐禹劾其不救下錦衣械繫打一百謫戍鎮魯今十餘年矣行乎患難無所怨尤忠直之性挫而愈厲是吾所矚若者也雅性格介吾不如吳汝薦蓋其幼時性慕冲玄故於世味澹然無欲予在儀制時汝薦爲戶部郎中一日來司中見架上紙十餘刀問曰此何用予曰將以換書曰此官物換書則其私也予曰戶部亦有之

兄何所用曰公則用餘則貯司庫以待來者後守廬州府治對有山所出柴木舊供府用曰此官物也計其值皆入庫作正數他可知矣母卒於官扶喪歸宅爲水所壞借其族兄房三間停柩且居之不謂陋也繼補保定則宿於堂之東間十日始一入宅廉靜之風僚屬皆化時谷近滄爲屬高陽令深服之巡撫真保時山陝地震閣臣以考察京官應之李南渠任其事九卿以下皆列爲等第汝薦以李同年得在一等與嚴世蕃徐陟陸燁趙文華輩同列渠甚病之時予免歸遺予書曰今次考察及九卿甚異事所謂一網打盡矣吾尚可久居此乎未幾竟引疾歸避居山寺數月不一至其家如此高舉豈吾所及公隆萬間復起歷戶部尚書左都御史功名氣

節一代仰之如山斗及其歿後每生忌日禱祀冢祠下輒千百人文集若干卷孫尚寶卿昕翰林編修曦刻之家塾

薦隱逸

康熙十年浙撫范中丞薦山林隱逸鄞縣葛世振明崇禎庚辰第二人翰林編修也旣以老疾辭不赴復奉 溫旨敦迫再以疾辭遂允其請又薦布衣董漢策以科道試用尋爲御史劾罷至下諸法司而秦督鄂善薦盤屋布衣李顥辭不至顥起田峻嘗一就科舉遂隱居讀書修明橫渠藍田之學富平李天生因篤昔嘗爲予言之

蔡卞白敏中

人有不可以一節取者宋史載蔡卞歷揚廣越潤陳五州廣

州寶貝叢湊一無所取及徙越夷人清其去以醬薇露洒衣
送之卽此一事論之雖與沉香載石同稱可也而乃出於卞
之巨姦白敏中在郎署李衛公器之多所延譽遺錢十萬俾
會省閣諸公宴已有日時秋霖涉旬賀拔惠員外求官不得
將欲出京來別惠與敏中同年闈人告以方候朝官惠駐車
畱書叙灞遊之困敏中得書歎曰士窮達當有時命豈有美
饌上邀當路豪貴而反遺故人遂召惠先宴既而朝貴聞與
惠宴衆皆去異日敏中謝衛公以畱故人負於推引衛公稱
之曰此真古人所爲以此一節觀之敏中過人遠甚然史稱
敏中受知德裕薦知制誥尋爲翰林學士至大川及德裕之
貶詆之不遺餘力議者訾惡敏中相業略無足稱怙威肆行

卒諡曰醜而黨附宗閔擯斥衛公尤爲當世鄙薄秦太虛著
論謂敏中不獨負德裕抑且負國家

聯語

張忠定公延一爲司空兩爲總憲以功名著累朝又鄉會試

得人最盛如劉文正理順吳忠節麟徵馮中丞元颺尚書元
颺夏考功允彝及周挹齋延儒輩皆門生也少時見公廳一
聯云門多將相文中子身繫安危郭令公

先忠勤公家訓

先高祖濼川公登嘉靖辛丑進士爲貴州叅議以王事歿於
黔贈太僕寺少卿子六人長贈布政使之翰次戶部左侍郎
贈尚書諱之垣卽先曾祖也次戶部員外郎之輔次淮安府

同知之城次浙江按察使之猷次高陽知縣之棟公教諸子最嚴家訓云所存者必皆道義之心非道義之心勿汝存也制之而已矣所行者必皆道義之事非道義之事勿汝行也慎之而已矣所友者必皆讀書之人非讀書之人勿汝友也遠之而已矣所言者必皆讀書之言非讀書之言勿汝言也諾之而已矣今刻石忠勤祠中先祖方伯公督不肖兄弟恆舉此訓廳事屏壁間亦皆書之

忠勤公諸孫

高祖忠勤公一日擁諸孫膝上時伯祖太師公象乾方伯公象坤光祿公象蒙皆方七八歲公戲問太師曰汝將來中第幾應曰第二問方伯曰第一問光祿亦曰第二公喜其後方

伯中嘉靖甲子解元光祿隆慶丁卯太師隆慶庚午皆第二人如其言四伯祖孝廉公象泰癸酉亦第二人其後叔祖戶部公象斗翰林公象節中丞公象恒皆以戊子先祖方伯公象晉以甲午叔祖考功公象春初名象異以癸卯相繼鄉薦皆成進士向見談薈諸書所載多訛舛詳述之

司徒公歷仕錄

曾祖大司徒公常自纂歷仕錄一卷謹錄數則於左以爲家訓云○予初選荊州府推官出京時卽聞彼地士大夫有好請託者予槩不敢從時如江陵相公乃翁曹都憲年伯紀山公亦不徇從後遂絕無以竿牘來者鄉官薛太守雲澤自京師回傳汪陵公語曰王公大有執持我甚服之○楚撫某公

陞任取荊州杉板二十副計費數百金太守趙公難之以問
予予曰公政績甚著且屢登薦牘今送杉板是賄而求薦也
不可趙公避之已而薦竟居首趙公名賢汝陽人歷官南吏
部尚書○荊州府庫有王府故祿銀遼王差校尉取討未發
時孫太守入覲通判王某署府事王提庫吏雷大夏立斃杖
下其兄具告撫按俱行推官王三月不發犯人予欲報參長
史不得已始發下犯人十四名皆羈監王怒出府往道署署
門閉遂至府前登鼓樓予與太守趙公同至鼓樓謁王王怒
甚云王推官辱我我何面目管束諸宗儀趙公力辭罷去予
隨以事至省過荆門州謁巡撫同鄉谷近滄公公曰王府事
不可激予應曰亦不可徇公曰昔有神童見一老僧僧曰汝

進一步則死退一步則亡神童應曰旁行一步亦有何妨子
正宜旁行時也予曰云何公曰子令家累且歸而身出查盤
俟王稍氣平仍具文來我再添一官會鞫庶好擔當予曰諾
歸卽送家累杞縣令姪象坤處次日遂赴永州月餘回同岳
州推官辛君會訊凡問軍一徒五王怒愈甚然竟無所施王
素不道後發高牆禁錮云○予爲舉人時以太僕府君忠勤
死事入京乞卹時嚴世蕃用事賄賂公行予謂縱賂得之適
足爲先人辱遂竟歸歸督諸弟子姪晝夜閉戶讀書相繼成
立竟得卹典○予以給事中充正使與禮部員外郎同年蹇
理菴公冊封鄭府崇德王事完卽日行餽謝甚腆一無所受
理菴與予意同後理菴官至薊遼總督兵部侍郎○穆宗時

陳皇后出中宮中外人心不安予具疏請皇后正位中宮以
端治本奉旨后侍朕久無子多病移居別宮以暢意耳汝不
知內庭事安言耶再上疏言皇后乃先帝選擇以遺陛下有
關睢樛木之德抑鬱成疾已爲不可乃云別宮暢意豈有夫
婦睽離而暢者哉奉旨后疾調理稍愈卽還本宮○湖廣有
大奸曰何心隱卽何夫山卽何兩川卽梁無忌卽梁光益的
名梁汝元本江西永豐人以侵欺皇木銀兩犯罪拒捕殺傷
吳善五等六人初擬死罪後得末減充貴州衛軍逃去各省
及孝感縣倏往倏來假講學爲名聚衆擾害地方種種不法
各省歷年訪緝不獲皆有卷案萬曆七年新店把總朱心學
於祁門縣獲之予發候按察使查卷問理已而心隱病死後

數年臺省諸公尚有爲何刑寃者蓋以假講學之名遂爲所
惑實不知其有各省訪拿卷案耳迄今公論始明○予爲戶
部侍郎管太倉見倉斛斗其一獨大異常問之云凡糧到倉
該倉斗級每人先支一斗此舊規也予曰是何言卽照常私
與亦是違法况另置大斗乎卽禁革之是年修總督倉塲公
署或云此銀例出各倉斗級予曰是烏可行宜乎大斗私索
也乃與大司農張心齋公言部發帑金修之著爲例○予平
日不囑託官府故入仕亦不徇人請託萬曆十八年太夫人
壽日鄉人具軸禮來賀者餘三百人予曰某素不敢管人家
閒事有何德於鄉黨敢勞諸君答曰正以公不說事不害人
大家陰受其賜故來耳○予初考選刑科卽請益於掌科朱

後菴公繪公曰切記不可聽人主使爲他人報私仇壞自己名節予佩服之後果有具稿暗送欲書予名者急謝去之月餘同鄉一道長却持此本問予予以實告不可染但唯唯越數日竟上之識者駭異果以此敗官○前輩涉歷事久多有高見有疑難事不能自決不可不以咨問予曾有二事一請教兵部侍郎吳公望湖一請教兵部尚書張公心齋二公論甚透切予深服之○予生平得朋友之益居多同學于公華峰等同僚吏部尚書趙公汝泉等同年兵部尚書劉公節齋等劉公在省尤相得予家居劉總督兩廣聞予病書來若疾痛之在其身寄桑寄生藥者再兵部尚書邯鄲張公弘軒總督薊遼書來林下者二每自念未能酬報吾子孫記之報之

○業師魏雲汀先生諱智任知縣同僚荊州府知府趙公汝泉名賢河南汝陽人吏部尚書徐公思重名學謨直隸嘉定人禮部尚書孫公山名用福建人知府江公心源名一麟都御史○省中何公來山名起鳴四川人韓公元川名楫蒲州人通政梁公靜齋名問孟河南人都御史張公湖東名鹵儀封人都御史丁公觀峰名懋儒東昌人知府朱公後菴名繪平定人少卿溫公一齋名純涇陽人尚書鴻臚寺賈公虛菴名儒雞澤人左少卿○南太僕劉公仁軒名穩衡陽人少卿許公敬菴名孚遠海鹽人侍郎○順天府丞朱公越崢名南雍山陰人太僕卿○戶部張公心齋名學顏肥鄉人兵部尚書劉公紫山名思問孟縣人南戶部尚書楊公夢山名巍

海豐人吏部尚書王公雲澤名廷瞻黃州人尚書王公後齋名友賢寧鄉人尚書○公生平篤於師友魏歲貢智公之師也公既貴常遇諸塗讓其乘騎於魏扶持上下而身跨蹇驢以從鄉人至今稱之

方伯公遺事

先祖方伯公年九十餘讀書排纂不輟雖盛夏衣冠危坐未嘗見其科跣常揭一聯於廳事云紹祖宗一派真傳克勤克儉教子孫兩行正路惟讀惟耕齋中一聯云容人所不能容忍人所不可忍癸巳歲作自祭文有云不敢喪心不求滿意能甘澹泊能忍閑氣九十年來於心無愧可借衆而同遊可含笑而長逝蓋實錄云公年雖大耄時時夜夢侍先曾祖司

徒府君或跪受扑責如過庭時云

方伯公同學

方伯公少在京邸從青州張見堯先生學同學者臨朐馮文敏公琦蒙陰公文介公翀馮與公一生方伯少兩歲兄事之後爲諸生受知提學理菴蹇公達名入書院凡四人則公及濟寧于中丞若瀛臨清柳尚書佐其一卽文介也公公萬曆辛丑進士改庶吉士時馮公以吏部侍郎教習庶吉士

方伯公答人詩

方伯公素不喜修煉之說恆揭寧靜澹泊四字於壁讀書眠食外惟瞑坐調息而已嘗有答侯晉陽大叅一絕句云問予何事容顏好曾受高人秘法傳打疊身心無一事饑來喫飯

倦時眠公歿時不肖年二十矣回憶公一言一行真義皇以上人也按饑來喫飯倦時眠乃傳燈錄義海禪師語王陽明與人論學亦曾引之

方伯公知人

二伯祖方伯中宇公象年十八領解爲嘉靖甲子明年乙丑成進士歷仕山西左布政使卒官貧至無以殮撫按以下爲釀金治後事乃得歸清正名臣也公藻鑑尤精爲河南提學時萬曆壬午鄉試榜將發直指問公曰解頭當屬何人公曰杞之周九臯否則汝陽李宗延耳已而周果領解李次之李公仕至戶部尚書

待御公殉節

伯父待御百斯公與登崇禎元年戊辰進士入翰林改御史甲申公家食已八年矣聞三月十九日之變同妻子盡節於几案間得手書一紙云京師卒破聖主殉社稷予聞之雪涕沾衣不及攀龍髯而殉命遂偕妻于氏子士和併命寢室命也奈何葬從薄從速隨時也公清介忠信言笑不苟鬚眉若神葬日會者萬人莫不流涕南城陳伯璣允衡論次公遺集比之宋江文忠萬里云崑山歸莊元恭詩云鼎湖痛絕競攀龍城守諸公繼扈從誰是簡書無諂責獨捐頂踵又從容九泉骨近平原廟千古名齊日觀峰欣慕執鞭嗟隔世好憑詩句想遺蹤

王劉二奇士

予鄉王遵坦字太平益都人太僕少卿濬之子劉孔和字節
之長山人相國鴻訓之子二人皆負氣踈地相友善王居家
桑谷劉居長白皆有林泉之美崇禎間見天下將亂散財結
客甲申歲孔和殺闖賊偽令率精騎萬人南赴金陵至淮陰
以兵屬劉澤清澤清與孔和素交時爲藩鎮貴重無比然好
爲詩一日大會將吏廣坐朗吟賓佐交口譽之孔和仰視獨
無語強問之曰公誠名將才然此事定復不急澤清怒罷酒
賓客皆惶懼失次孔和傲然而出澤清益怒遣人追及舟中
殺之已而金陵以爲副總兵官則孔和死數日矣遵坦入本
朝隨肅王平蜀爲巡撫四川都御史卒於闕劉有奕棋贈丘
將軍長歌云伏生之里大將出生來所志惟馬革幕中已多

指視功疆場血戰不勝筆堪嗟再謁典連敖不知三世還執
戟別君十載一瞬間歷盡鋒鏑與楛桎背貴那可入韓非晴
白聊足嘲吳刻多君談笑貫索中坐待明光銷蠹蝕昨聞廣
武拜軍師聖主懷邦丈人吉如今驅戰真市人聒聒怒蛙誰
與軾願君橫臂障東海莫令桑梓生荆棘安有健兒把犁鋤
但見春林巢小鳥從來外攘必內安隱憂不在河北賊夜涼
浮白戒談事更向局中問劫急已知文偉能辦賊不待當場
辨白黑贊若斂手推棋枰論兵艾艾終羞吃君功定可勒燕
然我詩空須錦罽織王有詩云怪鴟撲人山鬼叫草際幽燐
舊年少古豕老狸夜宴賓鬪體爲盤羅八珍玄熊文豹甘作
使噤不敢言但相指夫君意氣不自持拔劍向風劍光死一

身誰遣困蓬蒿呼天喝月未足豪驢脊如柴少羶勒小挫風
期非我曹愁多歡少天白頭倒鄭河水西向流一寸之心括
千古元氣茫茫生百憂金盆濯足錦爲厠以此相酬已堪恚
寄語聽冰九尾兒鷓鴣啼上寒楓枝劉又有贈王詩云都無
殺者黃江夏豈有食之嚴鄭公後竟死劉澤清手與黃祖事
絕類云丘名磊鄒平人少爲諸生有才名後走遼東詣軍門
上書積功至總兵官佩鎮東將軍印亦死澤清之手


節義

王氏亳州人李殿機妻也殿機父死於法母張氏沒官給配
象房校尉王福殿機因冒王姓繼粥於紅旗厄爾庫家王氏
在本籍年二十四歲矣叔兄強之嫁誓死不從康熙二十八

年負夫至京師時殿機已配蕭氏矣南城御史阮爾詢具疏
上聞竟爲夫婦殿機蕭氏皆斷髮爲民同歸於亳

封丘古蹟

同年岳給事鎮九秀起家封丘知縣有古循良之風唐高達
夫嘗爲縣尉向無專祠岳於西門外剏祠祀之縣南黃池北
蟲牢皆春秋古蹟又有青陵臺韓憑妻冢岳皆爲建祠立碑
表之此事近今長吏所少



廿四日亦看

述

